

疆域

城池·公署

城池、公署、坛庙、学校、社学、关隘、驿铺、津梁、仓储、义举蠲免。

城池

县城，在鹭峯山之麓，旧无城，仅有五门。明正德八年，知县朱袞重新为四门。东曰文兴，西曰双旌，南曰龙江，北曰玉屏。嘉靖三十三年（一五五四），巡抚王忬以倭警请城滨海诸邑，福清始筑城。周九百九十三丈，高一丈八尺，门仍旧。各建楼，水关二。知县钮纬相度未审外傅，崇冈弃险于外。三十七年，倭攻北门，登山放銃，守者溃，城陷。署令唐金，稍为增治。知县罗向辰至，尽平北阜之逼城者，增高城垣四尺，造二敌楼，设串楼于台旁。浚濠深广各二丈许，树以棘。万历元年，知县许梦熊增串楼十间。二十二年，知县丁永祚以城北傅山，西跨冈，东迫陵阜，而最要在北，乃拓城，徙其北之卑者于山，徙其西之高者于山之半，移旧城四百余丈，增新城二百余丈，四门各益以月城，又闢小北门。二十六年，知县张勉学改右腋二十余丈，稍委蛇其势，以避外矚。天啓四年，知县康承祖增筑东北敌台五，增高西北城垣四尺。崇禎七年署县郑尚友修。

清雍正十二年，知县张廷球，乾隆十年，知县饶安鼎，请帑修葺。

镇东城，在县东二十里方民、新安二里间。明洪武二十年，江夏侯周德兴檄筑为卫城，周八百八十余丈，高二丈三尺，厚一丈，为门四。永乐十八年，增建敌楼三十有一，并筑四门月城，俱高二丈。



公署

海防同知署，在平潭。

旧县承署，嘉庆二年，以建宁府同知，改驻同知张均，增建三堂。道光三年，同知王德溥领帑修。

知县署，在鹭峯山麓。唐嗣圣间建，县号数易，厅治不改。宋熙宁三年，崔宋臣为令，大新之。元元贞二年升为州。州尹毋逢辰重建。明洪武四年，仍改为县。成化三年，知县余泰建正厅幕厅。二十一年，知县庞璘建仪门、后堂及库房厅舍。宏治十五年，知县况璟闢而新之。嘉靖三十七年燬于倭。四十五年，知县叶梦熊重建。清康熙间，知县锤芝豫，乾隆间，知县饶安鼎修。旧有志喜堂，宋邑令章伯奋建，袭瑞堂、琴清堂、双桂堂，俱邑令范处义建。三思斋、益斋俱邑令曹绩建。憩亭，邑令李宗思建。爱山堂，邑令边应祥建。蜀香亭，宋时建。朝旌堂，元泰定间达鲁花赤忽答沙建。知州吴涛书匾。瑞芝堂旧为近民堂，元知州王庚更今名。

悬丞署在南日澳，嘉庆二年，以平潭县丞移驻。

典史署在县内左。

福清场盐课大使署。

江阴团盐课大使署。

福兴场盐课大使署，在岩头村福兴寺，嘉庆十七年新设。

镇守海潭总兵署。

中军左营游擊署，中军守备署，中军右营游擊署，中军守备署俱在海坛。

长福营参将署，在县城内。

右军守备署，在镇东城内。

废署附

宋丞厅

主簿厅

尉厅，俱在县治内。

明察院衙在县西报功祠左。

市政司分司在县治东南，旧为际留仓。

按察司分司在县西。

福宁道在县治西南元捕盗司。

府馆在县治西隅。

牛头门巡检司在县东南平南里岭前，元至正间置于迳江，名迳江巡检司。

泽郎山巡检司在县东化北里，元至元间置于练门，名练门巡检司。

锦屏巡检司在县东南平南里，旧为牛头巡检司。

壁头巡检司在江阴里，洪武十二年建。

迳北税课司在灵得里。

南门税课司在龙首桥北。

海口税课司、海口盐课司俱在方民里。

牛田盐课司在时和里。

镇东卫指挥使司在方民、新安二里间，镇东城内。

坛庙

社稷坛在县治北鸞峯山麓。宋时在县西南，元大德七年，知县孙仪重建。明洪武六年，建于今所。成化十七年修，清乾隆二年移永福里，九年复今所。

风云雷雨山川坛，在县南关外，明洪武六年建。

先农坛在县南新丰里水南寺右。

厉坛，在鸞峯山麓。

城隍庙，在县治北。宋康定元年，知县郑孟宾建，清雍正五年重建，道光四年修。

东岳行祠，在覆釜山。宋康定元年，县令郑孟宾建。明洪武间重修。

关帝庙，在县署东偏。乾隆三十五年，知县李本楠葺修。

文昌阁，在县治北。万历三十年，知县乌元会创建。叶向高记。清乾隆十七年，里人重修。

天后宫，在凤凰山麓。乾隆二十七年，知县张勤修，后参将宋泽重建。一在县东方民里灵慈庙。一在海坛。

灵著王庙，在县西隅后王山。祀唐左玉钤卫翊府左郎将陈元光。初元光以鹰扬卫将军，随父征蛮，镇抚漳州。因讨贼战没，立庙漳浦。宋时，邑人于漳浦请神香火祀于县前王巷。后迁今所。

都巡感庙应，在县西隅。神许忠，建安人。唐都巡检使，屯福清。乾符五年，破走黄巢。明年卒，人思之立庙，请于朝，赐额感应。

忠懿王庙，在浔洋里。王以军民筑大湖洋堦，民祀之。一在海坛，曰白马王庙。

昭应庙，在苏田里渔溪。祀闽王牙将虞雄，雄战没于渔溪，民立庙祀之，号通感王。绍兴二十六年赐今额。

龙江祠在海口龙山南。祀宋儒林光朝、林亦之、陈藻，宋末建。

一拂先生祠，在西关外。祀宋监安上门郑侠。宋开禧元年，知县箫尹躬奏立。明正德间重建。初名忠爱祠，万历间改今名。

叶向高记：一拂先生者，宋熙宁中，上《流民图》郑公侠也。罢官归，只余一拂，故称一拂先生。嘉定中，易先生名为介，今祠名仍称一拂者，以此邦人习焉，不欲改也。余惟先生声名在天壤，忠义在简编，魂魄在名山，俎豆在郡国，千秋无斁，乌用辞已。取先生传及谥议，读之叹曰：嗟夫，世之浅窥乎先生也。彼以流民一图，为先生重耳。夫先生力拒权相之招，至陷以美官而不顾。屡触群奸之怒，至中以危祸而不辞。汲汲皇皇，为万姓请命，此其人岂仅以慷慨敢言自表见者？银台之疏一上，人主至感叹咨嗟，徬徨不寐。举其平日君臣间，日夜讲求，以为振古之事业，一旦而几于尽格。是时元老大臣，如富、韩诸公，力争而不得。而先生以监门小吏，乃能得之。其精诚力量为何如乎！先生一争于安石而侷胜，再争于惠卿辈而遂不悟。新法之行而罢。罢而复行，先生之竄而归，归而复竄，以卒成元丰绍圣之祸焉。此天也，非先生之所能为也。吾读先生前后疏语，皆愤忠激烈，至于用兵之利害，群小之奸欺，反复开陈，无所顾忌。千载以下，犹足酸鼻。宜其足以感人主之心而动其听，使世之臣人者，皆如先生，天下岂有不可为之事哉。先生之志虽未售，而精忠劲节，已足暴于天下万世，无所复憾。独惜元祐汇征之时，仅以广文一秩，置先生于远郡，而无能推毂同升，以究先生之用。则司马诸贤，亦有不得辞其责者。后之议先生者，谥曰介。介然特立于众小人之中，犹可及也。介然独立于众君子之中，不可及也。斯其为知先生矣。夫金陵，自六代以来寄迹者不知其几，皆湮没无闻，而先生读书一片地，经今五六百年，草木犹香，庙祀勿绝，回视半山之亭，不啻霄壤。然则监门小吏，其所得为已多矣。

清乾隆间重修。

黄祖舜祠，在儒学内。宋嘉靖（应为嘉定——编者）十三年，知县时淇立。

王蘋祠，在儒学内。

林公遇祠，在儒学内。



陈大参祠，祀陈贵谊。宋绍定二年，诏罢福清税，从陈贵谊之请。邑人德而祀之。

刘克莊记略：绍定三年，诏罢福清县税。陈公贵谊之请也。时公侍经筵间，为上言：臣之乡邑，土瘠俗贫，物货不产，商贾靡至。其民皆垦山渔海以自给。海口镇，在县之东，略有墟市，县民之适镇者，镇民之至县者，不过各负挈所有相贸易，既税于镇矣。径港，在县之南，又置窰税焉。又税于县焉。是二十余里之内，凡三税也，不已重乎？臣尝访求其故，税钱之隶县者，日只数缗，隶州与漕者，月各四十缗而已。官府之大，利源之广，岂与赤子较此毫末哉？臣以为罢之，便玉音欣然。即可其奏，邑之父老，既扶携听诏，歌詠圣德，复相与像公而祠之。

林简肃祠，在凤凰山麓，祀宋少师林栗。

忠烈祠，在县东门外。祀宋昭抚使刘全祖与妻林氏，及林氏兄同。明万历二年建。

叶向高记略：忠烈祠者，祀宋招抚使刘全祖，与其妻林氏，及林氏之兄处士同也。炎景之季，招抚以国子丞家居，与处士同，念世为宋臣，图所以报宋。未几事败，处士盛服坐堂上，嚙指血题诗于壁而死。招抚败，转匿。元求之急，遂自经。有司执林氏，诘反状。林恚而叱曰：“吾夫吾兄，以死报国，何言反乎。血诗尚存，汝不知耶？”遂遇害。时林、刘子孙仅存如线。入明而至隆、万之间，刘之裔孙宗猷乃鸣其事于邑令南陵许公，以闻于学使者。永丰宋公开府桂林殷公乃檄邑，为特祠。邑令春秋致祭，俱如仪。因纪其始末，以垂无穷，且为吾邑重。

清乾隆间重修。

游公祠，在学宫西。旧为兴文祠，祀邑人宋提学游冠卿，以其输地建学也。嗣圯，后于兴贤坊内建祠，为社学，匾曰：游公灵迹。乾隆十九年，邑人陈季桎建今所。林昂记。

戚公祠在县西门内。祀少保戚继光，明嘉靖间建。清雍正十一年重修。一在海口镇，明隆庆元年建。

王一言记略：东南频岁多事，南塘戚公衔命仗钺，自浙及闽，以八月七日，兵抵福宁横屿。横屿之贼巢据者二年，公以至之二日，一

鼓尽歼之。即念九日，兵抵福清。福清之贼，巢徙兴泉之间者三年。公以至之四日，一鼓而歼其半，虎狼之雄，两地僵尸，皆数十里而奔逃竄伏。闻声而墜落者，数百里击累之。众生夺于锋镝之下，得全归者，以数千计。播迁流离之民，持携相率，而复其本业者，以数万计。功德可称量哉。

报功祠，在县治中。祀明巡抚汪道昆、总兵戚继光。

一在海口镇，祀明巡抚王恂、巡按吉澄、樊献科，郡守祁清、节推徐必达、邑令王崇文。嘉靖四十四年建。

一在瑞峯，祀巡抚阮鹗、总兵戚继光。

叶向高记略：去吾邑二十里，里曰方民，镇曰龙江。嘉靖乙卯，倭数千人突至，民仓皇不能御，杀掠无算。函峯阮公以中丞节来抚，请于朝，得赈金七千七百两有奇。镇之士民，合词请于公，不愿赈而愿城。公曰：诺。城成，倭复大至，镇人相率乘城，以死力鬪，倭遂巡去。乃相与醮金虑材于瑞峯之巔，奉公祠焉。戚公者，故尝以部将从公蹙倭于海上者也。自公之去，倭益肆，其巢吾邑牛田者，亦不下数千。戚公一鼓汤其巢，所馘杀殆尽。于是镇人复聚而谋祀戚公以配中丞。

崇德祠，在海口镇。祀明知县王泗论、王政新。

钮公祠，在西关外。祀明知县钮纬。

二罗公祠，在西门外。祀明知县罗向辰罗万程。

许公祠，在西门外水陸桥头。祀明知县许梦熊。

丁公祠，在西门外。祀明知县丁永祚。

张公祠，在西门外。祀明知县张勉学。

邬公祠，在西门外。祀明知县邬元会。

两贤侯祠，在西门内，祀明知县凌汉翀、汪泗论。祠右有喜雨亭。

康公祠，在西门外。祀明知县康承祖。

明德祠，在东门外儒学旁。祀明知县费道用。

金公祠，在涵阁，祀明都御史金学曾。万历间旱，金勘灾至，教民始种地瓜，民赖以不困。

仰止祠，在凤凰山麓，祀明大学士叶向高。



颂德祠，在渔街。福、兴、漳、泉四郡人，为明御史林汝翥建。董应举、莊铤邻记。

林公祠，在瑞岩山。祀明户科都给事中林正亨。陸清源记。

美报祠，在南门外龙首桥头。祀明尚宝司司丞叶成学。余（余？——编者）梦鲤记。

义烈祠，在县北圣迹寺旁。祀明夏叔慎兄弟子侄。

昭灵庙，在县南六十里余坑，祀保禧真人，宋天禧元年建。

废祠庙附：

孚应庙，在义泉岭下，神姓陈，能禁虎暴。宋淳祐间赐额。夫人殷氏，俗呼殷七娘，一作夫人鲍氏。

学校

学宫，在县治东。旧在西成门儒学坊外。宋嘉靖（祐？——编者）间邑人提举游冠卿输地为庙，乃移今所。

郭万程《福清宋元儒学志》：元丰元年建学。元祐六年，邑令方叔完广而新之，储书籍于经史阁。淳熙初，令刘敦为斋四。曰：持志、博约、立爱、时中。改学门南向。林栗记：元元贞元年廉访程文海修学门，自书匾。二年升为州学。大德三年，州尹毋逢辰创堂二，曰道立，曰帅正。延祐五年州判乃麻歹匾戟门。左曰肃容，右曰聚敬。至正九年，州尹林泉生，以前庙后学，类浮屠梵宇之制，乃更为左学右庙。

泉生记略：至顺间，予承之州贰视礼殿隘陋，在学宫堂下，堂崇于殿三尺。诸生列舍，居两庑，从祀。上语州长曰：“此浮屠梵宇之制，非礼也。请更为左学右庙。”不果。至九年夏，予叨守斯邦。明年辛卯之冬，始构讲堂，因北山之麓以崇其基址。楹以巨石，梁以豫章，为殿屋四雷四阿，遵古制也。讲堂为厦屋，在东庑之东南。玉旌诸峯，秀出其前，昭文明也。堂下东西有二序，南有泮水，麗泽之亭，励讲习也。又南为前序，大小学明事师者。北面也，由堂及门凡为屋七十五间。十二年六月，申侯国辅来代予，时承宪檄治兵海上，往来督戍，及解严，谢去。

十二年知州申国辅建戟门，新两庑。陈豫记：明洪武初复为县学。立射圃，及观德亭。成化十七年，知县庞琯建櫺星门。宏治间，知县沉璟建圣道坊。提学副使杨子器修两斋，匾曰：居仁、由义。嘉靖三十七年燬于倭。越七年，邑人都御史陈士贤重建。叶向高记。知县督应元、叶梦熊、罗万程、丁永祚相继成之。万历初，知县欧阳劲建。

啟圣祠，于明伦堂左。祠前创敬一亭。

叶向高记略：嘉靖戊午，岛寇戕，邑学烬焉。后稍建庙及堂，余



以时诎阙如也。岁壬申，邑令南陵许公，为学舍数楹，于堂之东，集诸生絃诵其中。公去而弛业稍复颓圯。博士龙溪蔡公以孝廉来奉职，令则岭南欧阳侯相顾咨嗟，乃谋从事，诸废一新。余自籍青衿而游于斯，徘徊宫墙，穆然深念，乃今二十年来而覩有兹举也。令尹博士之功亦此邦为烈矣！昔在草昧，闽号閩胥，职方之籍不比于中土。观察肇兴文教，乃阐说者谓闽实多贤，乃其为闽重则建溪诸儒，至明而俎豆者四，闽无与焉。视往昔替矣。重闽在土何可以不勉旃？以余所闻，建溪之业，肇自道南，同时及门实推信伯，固融产也。建溪引濛汜而中天，故于今昭烁信伯，再传而亦之，又再传而希逸，星晨没矣。源流正学邈于前修，闽自建溪外宜莫先融绍明久晦之绪以有辞来许，亦在此时也。兹役也，肇于辛卯岁季夏，其秋博士上南宮再至而始讫功。令尹未讫而去，乃功俱可述矣。

泰昌元年知县王政新、邑人大学士叶向高重修，施兆昂记。清康熙十七年知县白琯、十九年知县邓献英相继修葺，郭文祥记。邑人季范建文昌阁于庙东，三十八年邑人李日燦修庙学，张士栋记。乾隆四年邑人何敬祖修，王恕记。庆嘉（嘉庆？——编者）二十四年邑人翁梦澜等捐资重修。

名宦祠在庙先（前？——编者）东，祀唐贾郁、林撰，宋方偕、郎简、莊柔正、毛国华、颜师鲁、方棫、刘朔、曹绩、叶廷珪、赵希汉、李元吉、章国奋、徐辉、傅楫、翁邵、林孝泽、林枏、刘崇之、傅大声、黄国镇，元马合马沙、林以顺、林泉生、曹道振、刘志，明江仁、余懋、刘忠、蔡光亲、周玠、余泰、康永绍、庞縱、邓概、陈逅、张懋、钮纬、罗向辰、罗万程、王政新、费道用、刘以修、周南、何公溥，清范承谟。

乡贤祠在庙前西，祀宋郑侠、游冠卿、黄祖舜、王蘋、黄颜荣、林栗、陈贵谊、敖陶孙、林亦之、陈藻、林文之、林公遇、林珪、林希逸，明林扬、鄂孟、韩宏、何宜、林清、谢天锡、陈伯谅、薛廷宠、陈仕贤、施千祥、翁世经、郭万程、李庶、薛曾、叶朝荣、毛孔墀、魏体明、叶向高、方懋学、余梦鲤、林茂槐、施一皋、江潮宾、林元豪、林有台、郭应响、何玉成、施作岐、林有材、陈若志、郑潜、郑廷楫、叶成学，

清张可立、李日燦、何敬祖、张甄陶。

教谕宅在明伦堂后。

训导宅在仪门东。

学额见闽县。

学田原额二百五亩零，实徵租银二十二两三钱六分零。康熙二十一年总督姚啓圣捐置田五十五亩五分。

学校

龙田（按：田字误，应是江字）书院在海口龙山北麓，林光朝、林亦之、陈藻三先生相继讲学于此，今废。

明德书院在治北隅，康熙四十三年知县潘树枏建，中祀朱子。

闻读书院在治东福唐里，唐水部郎中陈灿读书于此。

石塘书院在治西文兴里，宋林公遇讲学所，景定四年建。

兴庠书院在西隅大街，雍正元年建，祀唐常公袞宋二程子。

双旌书院在西门内，旧係阮公祠，久废。康熙五十七年改建。

社学

文在社学在东隅小桥街。
玉屏社学在东隅双连巷。
文明社学在西隅产塘街。
清和社学在西隅。
安胜社学在西隅上巷。
振扬社学在西门西门兜。
文山社学在西隅涧下。
仰高社学在西隅产塘街，今改清贵。
西塘社学在南隅官塘边。
万安社学在南隅柳池头。
鳌峯社学、齐雲社学俱在南隅南门兜。
中和社学在南隅中巷。
龙溪社学在南隅。
崇文社学在南隅场前街。
永安社学在南隅郑巷。
万寿社学、阳春社学、安仁社学俱在北隅。
养端社学、亨蒙社学、安宁社学俱在北隅后埔街。
玉井社学、澄清社学俱在北隅上井街。
崇禧社学在东街。
擢英社学在东隅横街，今废。
正音书院在明伦堂左奎光阁，雍正七年奉文设立。

关隘

福清县内蔽三山而外通莆阳、泉、漳，实馆毂要地。
军砦在县西善福里，宋初游洋林氏侵犯鄰境，因宿重兵于此禦之，故名军砦。
宋将军砦在县西二十四里石竹山，又西有古屯军所。
宏路砦、把店砦、渔溪砦、苏溪砦、蒜岭砦、峯头砦六砦俱康熙元年署县王孙枢造。
镇东砦、九龙山后砦，二砦俱康熙九年知县申锡造。
海口巡检、松林巡检、南匿巡检俱宋置，后废。
泽朗山巡检在县东南七十里，元置于练门，名练门巡司，明洪武十二年移改，今司废。
锦屏司巡检，康熙间裁。
江口巡检，道光十二年裁。俱详国朝职官。
清，卫裁改为寨，分拨长福营左军守备驻防。
万安城在县东南一百二十余里，明江夏侯周德兴檄筑为千户所城。周五百二十五丈，东、西、南为门三，各建楼。
清康熙三年所裁安兵防守。
海口镇民城在县东二十里海口镇。明嘉靖间因倭患，巡按吉澄请发帑金七千七百两赈卹，镇民愿以所赈筑城，鳩金数千两成之。周八百四十四丈，门五。南曰起龙，北曰镇安，东曰通江，西曰擢桂，西北曰嘉猷。后倭寇蹂躪，村落为墟，独镇以有城守禦得免。万历十年知县罗万程请帑修之，三十五年凌汉翀修西南沿江一带。四十三年知县汪泗论增高东北一带，四十六年久雨城圯，知县王命卿重修。
清顺治初海寇據城，四年大兵平定之后为寨，设塘汛。
沙塘镇民城在县南五十里，明隆庆间造。
化南镇民城在化南里，距县东南六十里，明嘉靖间造，今废。北数里曰化北镇，相传隋时掠琉球五千户居此，因名。

驿铺

宋承唐制，三十里有驿，非通途大道则曰馆，计程自福州省会始，南出莆田，北抵永嘉，西达延平，车旌之所宿会文檄之所，往来求其安便迅驶而无阻绝沉滞之忧，故更易废置，其制犹可得而考云。

宋大义临津驿，河口渡次。

常思铺，福清南取太平七里。

太平驿，福清四十里。

太平铺，南取假面十七里 按《八闽通志》驿之左有宏路站。

假面铺，南取渔溪十八里。

渔溪驿

渔溪铺，南取蒜岭二十三里。

蒜岭铺，南至莆田县界三里，至迎仙二十八里，至兴化军五十里。

元宏路站，在县西善福里，宋时建于太平铺之左，至元十六年徙建今所。

蒜岭站，在县西南光贤里，宋时建于渔溪市之南，至元间徙建今所。

县前铺，在县治南五十里。

常思铺、磨石铺，二铺在方兴里。

太平铺、高车铺，二铺在修仁里，上五铺俱县西北。

金应铺、玻璃铺，二铺在清远里。

渔溪铺，在万安里。

苏溪铺，在安香里，四铺俱县西南，以上九铺俱至正间建。

明宏路驿，元为宏路站，洪武十二年改为驿。

蒜岭遞运所，在蒜岭之旁。

宏路遞运所，在宏路驿之旁。上二所俱洪武十二年设后并省入各驿。

县前铺，在县治南五十步。

常思铺、磨石铺，二铺在方兴里。

太平铺、高车铺、金应铺、玻璃铺、渔溪铺、苏溪铺、蒜岭铺，上九铺仍元旧。

宏路铺，在善福里。

浯溪铺，在清源里，二铺俱县西。

上店头铺，在县南仁寿里。

海口铺，在县东新安里。

三山铺，在县东南化北里。

桃林铺，在平北里。

后坑铺、城西铺，二铺在平南里，上三铺俱县南。

薛田铺，在县东永宾里，以上十铺俱洪武间增设。

清宏路驿，原设贍夫六十名，遞夫六名，兜夫十五名，现定贍夫五十三名，遞夫六名，兜夫二十五名。

蒜岭驿，原设贍夫六十名，遞夫六名，兜夫十五名。现定贍夫五十三名，遞夫六名，兜夫二十二名。

县前铺、常思铺、磨石铺、太平铺、高车铺、衡路铺、金印铺、玻璃铺、渔溪铺、苏溪铺、蒜岭铺，铺兵各五名。

锦屏铺、南门铺，铺兵各四名。

牛田铺、王山铺、桃林铺、后坑铺、城西铺、溪梧铺，铺兵各二名。

薛田铺，铺兵一名。

各铺四至

福清县县前铺西南十里至南门铺，十里至锦屏铺，十里至衡路铺，十里至金印铺，十里至玻璃铺，十里至渔溪铺，十里至苏溪铺，十里至蒜岭铺，二十里至莆田县江口铺。

县前铺北十里至高车铺，十里至太平铺，十里至磨石铺，十里至常思铺，十里至闽县尤糗铺。

县前铺西外十里至城西铺，十里至后坑铺，十里至桃林铺，十里至溪梧铺，四十里至长乐县巴头铺。

县前铺四十里至牛田铺，十里至王山铺，十里至薛田铺，十里至永福县创岭铺。

津梁

东塘桥，在东门外。

永济桥，在西门外，明正德间知县冯安举涧下卢溪二废桥之石构成。此桥建坊其前，颜曰“澄源桥”，岁久坊废桥圯。万历初知县许梦熊葺之，更今名，其相近者曰水陆桥。国朝康熙间知县申锡修。

龙首桥，在南门外，宋天圣五年灵石僧洞然命其徒义韶募缘建，长四十寻，广二丈五尺，名曰“通海”。元祐二年斂石僧显光及乡人林日进复募缘，为梁三十，长二十五丈，改名“坦履”。绍兴三十年知县黄童、邑人刘克恭又募缘，为梁八，长一十六丈，构亭其南，合前后三桥，为梁二十有五，长七十余丈，又改今名。元至治二年僧洪琛修，明万历初知县许梦熊重修，邑人叶成学请于知县凌汉翀，移桥于小孤山，亘五十五丈，阔一丈五尺，为门十有九。国朝康熙间知县李长甲修，雍正间知县吴锬复修。

小桥，在县南门内直街。

里桥，在县南门外。

溪头桥，在北隅，接涧溪，宋宝庆间李提刑建，初名“提刑桥”。明嘉靖三十七年知县罗向辰拆石增城而废。

庆济桥，在北门外，明万历间邑人林子泰建，以上附城西隅。

士林桥，在县西南，宋开宝五年建，嘉定九年邑人卓森重建。

浦桥

浔阳桥，五间三梁，桥首有碑篆“浔阳”二字。

涧下桥，宋绍兴间建，凡五门。元元贞二年重建，拆建澄源桥而废。

卢溪桥，宋绍兴间建，明正德间水圯，知县冯安拆建澄源桥而废。

涧溪桥，宋绍兴间净明院僧契慈建，绍兴间里人林昭显与其侄舜英续建，元里人许自重修。

石堦桥，在太平铺前，宋治平三年禅僧为贲始伐石累址，而梁其上，长四十丈，镇以石塔，即今太平桥。

洋子桥，宋绍兴间里人林昭显与僧法宾募建，长一十三丈有奇，元至元间里人许自重修。以上修仁里。

灵源桥，宋政和间僧正觉建。

三星桥，在灵源桥之上。以上清源里。

三阳桥，明景泰间建。

波澜桥，明成化间太监陈道修，乾隆初复修。以上方兴里。

郊下桥

里尾桥，一名可溪，承流接里尾港。以上永东里。

新桥，此桥上承古龙东西溪流。明永乐间女冠陈恭清募建。嘉靖间兵马司陈猷赤修，崇祯间重修。

槿柄桥

湖尾桥，在流桥之上。

溪边桥

流桥，跨古龙东溪之上，三间五梁。

古龙龙首桥，跨古龙西溪之上，东西立二陂，凡三间五梁，左右镇以塔，如龙首，故名。以上方成里。

坡尾桥

新桥，宋绍兴间建，嘉定二年邑人林楫修。以上永福里。

安境桥

作坊桥

塗贡桥。以上遵义里。

镜桥，明成化间太监陈道修。

迳镇桥，旧传罗隐过此坐于桥梁，其石热甚，遂嗔之曰：“迳镇日落便清。”至今有验。

躡雲桥，在迳江翠林，宋元丰间僧守思及其甥李诚募缘建，长三十丈。政和五年复筑室于桥亭之西。明嘉靖间重修，总兵戚继光大破倭于此。以上灵得里。



光贤桥，在蒜岭，乾隆间知县刘增修。

迎仙桥，莆福迳路也，旧名上洋桥，又名江口桥。为梁三十。宋元祐间建。清雍正初邑人魏明昌重修。以上光贤里。

屯上桥，宋景德二年建。

航下桥，跨江临海，明宏治间里人薛元敬先造五门，万历年元敬孙舜韶、曾孙雲緘增建长桥，自航下跨江至高岭前二里许，凡四百四十四门，桥首建坊曰“继先成绩”。桥末建坊曰“鳌江”。桥坊圯于风，石址尚存。

瞻阳桥，明嘉靖初建桥左右迎潮塔。

赐金桥。以上化南里。

王董桥，在石竹山下，宋进士王鸱、武举董琳共建，因名。

鲤尾桥，在石竹山下，承王董、灵源二桥水。

沈桥，在石竹山真武殿前。以上仁寿里。

古屯桥，在县西十里，明宏治间知县况璟重建，万历年知县罗万程修，后因水圯，清乾隆间知县饶安鼎、刘增复先后倡修之。

宏路桥，在县西宏路驿东南，宋熙宁七年增超渐建，为梁十有五，广二丈二尺，长二十九丈。明成化间太监陈道修，万历年知县汪泗论重建，清康熙间参领张拱垣募建，又名无患桥，以邻于石竹无患溪，因名之。

交溪桥，在善福里，两溪交合，故名。宣和四年林公孙建，长四十丈，淳熙五年改名登龙。

安香石桥，在苏溪，乾隆间知县刘增修。

龙江桥，跨方民、仁寿二里，始太平寺僧叠石为基，宋政和三年林迁与僧妙觉募成之，为梁四十有二，广二丈，长一百八十余丈，名曰“螺江”。提刑刘峤更名“永平”。后邑人林栗又改今名。清顺治间知县朱廷瑞修，康熙间邑人张翊晟重修。

万安桥，在万安里，即渔溪桥。宋嘉祐七年建，崇宁元年为洪水所齧，邑尉黄国镇倡修，旧为间十五，续增为十七，广一丈，长二十五丈。乾道元年尉赵善谏修，更名“化龙”，明成化间太监陈道重修，嘉靖

初复溃，隆庆间修复圯，清乾隆间邑人林璧等捐修。

紫雲桥，在万安里阪头，乾隆间林璧倡建。

玉铁桥，在苏田里，明成化间太监陈道修。

三山桥，在化北里，旧名鹿坑。

见龙桥，在毗和里牛田镇。

东山桥，在五十九都。

白马桥，在六十都。

城头渡、益崎渡、柯屿渡、应天渡、段渡、蒲头渡。以上灵江里。

下渚渡、双屿渡、白沙渡。以上江阴里。

海口渡，在方民里。

崎头渡，在灵得里。

河头渡，在南门外，今废。

水陆渡，在西门外永济桥，今废。

叶向高《龙首桥记略》

邑故有龙首桥，与南门相直，形家以为病，先少师公常欲移之而力不能。其后父老诸生咸言其不便，相与请于邑令凌侯，醮金鸠工，移桥于东南，建塔江浒，搆梵宇其间，与桥相属，于是水口完密，风气益固。凌侯与后令汪侯实纲纪之。其倡议鸠工，则吾儿成学，父老林思谏、张志达、刘前、夏有知等始于万历三十四年丁未之季冬，竣于十三年乙卯之孟秋。

叶向高《赐金桥记略》

昔二疏归来，以赐金置酒，日与故旧宾客乐饮，书之于史，至今犹称引以为美谈。余以海上孤生，遭逢明圣，位极人臣，辅政八年，毫无善状。每怀止足之谊，垦切乞归。上慰留甚殷，至六十余疏，乃得请。温纶隆溢远过二疏。又赐百金以为归装，并前后赐赉可千余金。余既徙居邑中，去故里稍远，欲与宗族乡里朝夕相娱乐而不可得。乃稍斥其金，治先世坟墓，树之绰楔，营祖居为祠，以奉蒸尝，伐石磬道可数百武，为梁于渠，以免病涉，且完一方形胜。亭其上，而名之曰“赐金桥”，使吾乡之人凡出入于斯者咸知此桥之成为明主之赐，



世世北向稽首毋忘圣恩也。其与欢会乐饮于一时，徒以金钱糜之饮食而于闾里靡补益者不较胜哉。

叶向高《宏路桥记略》

吾邑邮路所经，为桥者三，曰宏路、渔溪、江口。皆创自前代宏路之水，自永福而来白鹤百丈诸流注焉。渔溪则源出仙游，合黄蘗而通海江口，受莆阳诸水与潮汐会其流皆迅急，徂岁之秋洪水骤兴，三桥皆圯。以力拙不能举，邑侯江君白于中丞袁君、直指李君，得羨金三百两，分其三之一为三桥，复捐俸及劝募成之，凡在四封，民无病涉，遂塗歌輿颂咸归侯功。

郑亦鄒《龙江桥记略》云：福清县治二十里之龙江桥，戒徒庀工大修厥废，计石梁五，扶阑百八十丈，纍齿四十有二门。初，桥之成也，在宋政和之世，名曰“螺文”，次改“永平”。绍兴间林简肃公始定今号。越大清丁亥废，乙未冬邑士大夫稍修治之。又数年海波湧断其五梁，则又废。先是，进士张公立读书其旁，慨然以兴复为志，将死，命其子翊晟、陟昂曰：“是我志也，桥治身没无恨。”后诸子咸登仕版，克绍先生，乃与兹役鳩工，于戊午仲夏阅次年五月告成。

仓储义举

宋太祖乾德元年令诸州于所属县各置义仓，太宗淳化五年令诸州置惠民仓。福建于咸平四年始置，神宗元丰五年诏福建路发常平钱输元丰库。孝宗乾道四年建宁始立社仓。时建安饥，朱子请于府，贷粟（粟？）六百斛，籍户口散给之民赖以生。及冬有年民愿赏粟（粟？）于官，知府王淮俾留里中，而上其籍于官，社仓之立始此。六年福建转运副使沈枢奏水旱州郡请留转运使和余米以贖常平，诏即施行。宁宗嘉泰四年南剑州始立举子仓。初，绍兴中朱子闽人生子多不举，请立举子仓，至是，叶筠知南剑州亦以为请。淳祐间赵汝愚帅闽，推广其意，括绝没之田产召佃输租，仍发粟本收储，遇受孕五月以上者则书于籍，逮免乳日人给米一石三斗。理宗绍定四年以建剑秋霜害稼，令诸司措置搬运广米应济市粜。嘉兴三年以建、剑、汀、邵早伤，诏提举常平司覈所部州县常平义仓之储以备赈济。

各州军仓

福州

都仓，即王審知所创西版仓，旧在子城外。熙宁二年拓丰乐门仓，乃在子城内。

省仓，咸平四年始置，初，诸邑输米悉趋都仓，至是，大理寺丞马易从奏诸郡外县合销粮草令顺便受纳于是，敕各置仓，闽侯官、怀安以倚郭不置，其连江、永福、福清、长乐、长溪、罗源、宁德、古田、闽清九县皆置。常平仓，皇祐元年始置。初诏州置常平翰林侍读学士宋祁以为远县乡保力农之家无由霑被，是岁州始以常平都数量户口多寡九县置仓。按常平仓、省仓、社仓、举子仓通行各州郡，今祇据其建置其址事实可考者载之，各郡倣此。

仓储

元世祖至元二十三年令以铁课余粮充常平仓，元初设议仓于乡社，又置常平于路府，其法：社置一仓，以社长主之，丰稔则纳粟，荒歉则就给。遇水灾饥歉皆发义仓赈之。又有和余和巢之法。武宗至大二年令随处路府州县设立常平仓以权物价。仁宗延祐四年敕郡县各社复置义仓。其法：以五十家为率第其户之高下，每岁收成日输粟于仓，以备岁歉而贷之。及冬则取盈，每石入息一升，社长主之，名曰义仓。顺帝至元元年以改元诏立常平仓。

各路仓

福州路

义仓，福清九所

仓储

明太祖洪武三年令州县东西南北设预备仓以赈荒歉。成祖永乐中令天下府、州、县多设仓储，移置预备仓于城内。英宗正统元年令所在有司增设社仓。孝宗宏治三年限州县卫多积谷数以多寡为殿口，限州县十里以下积万五千石，二十里积二万石，卫千户所万五千石，百户所三百石。嘉靖初令府积万石，州四五千石，县二三千石为率，其后数益减，科罚亦轻。神宗万历中上州郡至三千石止，小邑或仅百石，有司沿为具文屡下诏申飭，率以虚数欺罔而已。七年令福建布政司凡预备仓粮给饥民，每米一石，候有收之年折纳稻谷二石五斗还官。十八年令赎罪贖罚银皆余谷入预备仓。世宗嘉靖八年复令设社仓，其法：民二三十家为一社，择家殷实而有行义者一人为社首，处事公平者为社正，能书算者一人为社副，每朔望会集别产上中下出米四斗至一斗，有差斗加五耗六合，有司造册送抚按，岁一察覈，仓虚罚社首出一岁之米。神宗万历二十九年福建巡抚金学曾奏乡官陈长祚、林鸣盛等倡义建常平仓于官、劝义仓于民。又有义廩以倡缙绅之尚义者，乞量加服色以示奖励从之。

各府县仓

福清县本县仓万安仓。

仓储

清顺治十一年议定各府州县常平义社各仓责成各道员专管。康熙五年严察福建採买麦料，毋许借端累民。二十年以福建旱灾令于广东、浙江余米平糶。三十一年令福建照山东捐输之例择地备貯。旋以福建沿海之地民间多种稻谷不比北省多种麦粟，嗣后只令劝输稻谷。四十三年议定福建仓谷存留发糶数目。福建现在捐输谷二十七万余石，常平仓谷酌五六十万石，其内地积谷仍按原存州县之额数存留，其常平谷时价尽数发糶至台湾，一府三县孤悬海外，现在捐谷八千六百石，常平仓谷一十一万余石，除每县应平谷石，其余尽糶，貯银遇荒赈济所存谷石仍照例出易。

仓储

清平潭厅常平仓计一十六櫓，额貯谷三千五石五斗，属福清县平潭县丞。

福清县常平仓七座计五十二櫓，乾乾（隆？）四十一年知县杜锡龄额项修貯谷三万二千五百一十五石五斗九升三合，户部则例载额三万一千五百一十五石五斗九升三合。

各属义举据各府志，其因仍前，代之旧者不载，载其建造迁移修理年月基址可考者，后做此。

宋福清县常平库在县厅西街上。义塚在县北隅弥陀寺后山，宪使李迪捨立。

元福清州养济院在州西隅北溪，旧在北门，大德四年知州毋逢辰移今所。

明福清县养济院在县西隅，洪武间建，成化十九年知县庞璘重建。清福清县普济堂在县西门。育婴堂在县城内下井街。养济院明旧址。

蠲免

元顺帝至正十六年诏沿海州县为贼所残掠者免田租三年。

清顺治十一年诏免顺治六七两年直省地丁逋赋。

十三年诏免顺治八九两年直省地丁钱粮逋赋。

康熙三年诏顺治十五年以前民欠各邑赋税悉除之。

四年诏免顺治十六、十七、十八三年逋赋。

二十五免福建二十六年秋冬、二十七年春夏额赋。

四十五年谕免天下逋赋，有已徵在官者即抵本年正赋。

四十九年通免天下康熙五十年钱粮。

五十二年谕免天下明年房地租税及积年逋欠。

雍正二年谕恩诏议免各省钱粮，自康熙十八年至四十五年止著加恩将五十年以前旧欠银米等项均察明豁免。

六年谕免福建康熙五十五年至雍正四年逋赋三十三万八千余两，其有已徵在官者除明年正赋。

十三年九月高宗登极诏免天下田租及雍正十二年以前逋租，明年又免各州县入官地租十之三。

乾隆七年诏免福建雍正十三年未完民正项钱粮，与江苏、安徽同免，共十七万七千六百七十四两。米豆粮与甘肃、江苏同免，共九万五千二百六十九石。裸项钱粮与直隶、江苏、安徽、甘肃、广东同免，共二千九百二十四两。又免裸项租谷四百四十八石。

十年普免天下钱粮，福建于十一年轮蠲并蠲台湾府属一厅四县额徵供粟十有六万余石。

三十五年普免天下钱粮，福建于三十六年轮蠲仍将台湾府属四县额徵供粟一十六万余石全行蠲免。

五十五年普免天下地丁钱粮，议准自乾隆五十六年为始将各府州

县实在额徵银数次第均匀搭配，分作三次轮免，每年应免三分之一，其福建、台湾应免供粟一十六万余石，亦照内地之例分年匀免。

六十年普免天下地丁钱粮，议准自嘉庆元年为始照前届之例分作三年匀免，其福建、台湾供粟亦照例匀免。

嘉庆四年诏免乾隆六十年以前积欠。

二十四年诏免嘉庆二十二年以前积欠。

免科

嘉庆二十一年除闽县被水充坍田粮，又补除嘉庆十七年侯官县被水冲坍，嘉庆九年福清县被水冲陷田粮。

免役

顺治六年海寇为乱，以福清等二十县士民能效死守城，免本年丁徭以示鼓励。

灾蠲

雍正六年福州府属闽县、侯官、长乐、福清、闽清五县，泉州府属晋江、南安二县俱秋旱，诏依被灾分数蠲免钱粮。又诏将康熙五十五年至雍正四年旧欠地丁银两概予蠲免。

嘉庆二十年以福清界内平潭夏旱秋雨收成歉薄，鱼鲜缺产，奏准除已征钱粮渔课一千四百余两外，其余未完正耗银两并所豁南日县丞应征田粮及带征积欠俱缓至来年征收。

道光十二年十月奉旨福建长乐、福清二县八月间风雨潮涨，沿海被淹，各村庄应征本年下忙并明年上忙正裸钱粮粮米均缓至来年秋成后征收。

賑卹

乾隆十五年十二月闽县、侯官、福清等县水灾，奉旨賑卹银数有差，动支公费。

福建省额内收养孤贫四千一百八十九名，福清县八十九名，每名岁支冬衣花布银五钱四分五釐六毫有奇。